

KARATE SAVEZ KANTONA SARAJEVO

S T A T U T

SARAJEVO, JANUAR 2010. GODINE

Na osnovu člana 18. Zakona o udruženjima i fondacijama ("Službene novine Federacije Bosne i Hercegovine", broj 45/02) na Skupštini Karate saveza Kantona Sarajevo održanoj 30.1.2010. godine u Sarajevu, uz učešće klubova zastupanim po ovlaštenim predstavnicima u cilju usaglašavanja sa Zakonom o udruženjima i fondacijama Federaciji Bosne i Hercegovine (u daljem tekstu Zakon), izvršene su izmjene i dopune Statuta Karate saveza Kantona Sarajevo od 11.06.2008. godine.

STATUT KARATE SAVEZA KANTONA SARAJEVO

OPĆE ODREDBE

Član 1.

Statut Karate saveza Kantona Sarajevo (u daljem tekstu Savez) definiše i sadrži:

- I Naziv, sjedište, pečat i obilježje Saveza;
- II Ciljeve i djelatnost Saveza;
- III Zastupanje i predstavljanje Saveza;
- IV Članove Saveza;
- V Reprezentativne selekcije (reprezentacije) u Kantonu Sarajevo;
- VI Organe Saveza i sekretara, način na koji se biraju, ovlaštenja koje imaju, kvorum i pravila glasanja, trajanje mandata, lice ovlašteno da sazove Skupštinu, uslovi i način raspuštanja, odnosno prestanak rada;
- VII Pravila za ostvarivanje, korištenje i raspolaganje sredstvima Saveza, kao i organ koji je ovlašten za nadzor nad korištenjem tih sredstava;
- VIII Postupak za izmjenu i dopunu Statuta, ovlaštenje i način donošenja drugih općih akata;
- IX Uslove i postupak za pripajanje, razdvajanje, transformaciju ili raspuštanje odnosno prestanak rada Saveza;
- X Postupak za raspolaganje preostalom imovinom ili drugim sredstvima u slučaju raspuštanja ili prestanka rada Saveza.
- XI Završne odredbe.

I NAZIV I SJEDIŠTE SAVEZA

Član 2.

Puni naziv Saveza je:

Karate savez Kantona Sarajevo.

Skraćeni naziv Saveza je:

KSKS.

Član 3.

Udruženje djeluje na teritoriji Kantona Sarajevo.

Sjedište Saveza je u Sarajevu, ulica Mis Irbina br. 8.

Član 4.

Savez ima svoj pečat. Pečat je Saveza je okruglog oblika, prečnika 30 mm sa latinicom ipisanim tekstom po obodu "KARATE SAVEZ KANTONA SARAJEVO" i tekstom SARAJEVO po prečniku.

Član 5.

Savez može da ima znak i zastavu. Odluku o njihovom izgledu i obliku donosi Skupština ili po njenom ovlaštenju Upravni odbor.

Član 6.

Karate savez Kantona Sarajevo punopravni je član Karate saveza Bosne i Hercegovine, koji je priznat je od Olimpijskog komiteta Bosne i Hercegovine. Uslovi udruživanja su regulisani Registracionim pravilnikom Saveza. Prava i obaveze udruženih članova Saveza regulišu se općim aktima Saveza i ugovorom.

Član 7.

Savez je nepolitička, nevladina organizacija i ne dozvoljava diskriminaciju bilo koje vrste.

Savez se udružuje u Karate savez Bosne i Hercegovine.

Savez se može učlanjivati, udruživati i u druge asocijacije pod uslovom da to doprinosi razvoju i unapređenju karate sporta u Bosni i Hercegovini i Kantonu Sarajevo.

Član 8.

Savez je pravno lice sa svim pravima, obavezama i odgovornostima utvrđenim Zakonom i ovim Statutom.

Svojestvo pravnog lica Savez stiče upisom u registar kod nadležnog organa.

Član 9.

Savez ima svoj žiro račun kod poslovne banke.

Za preuzete obaveze, Karate savez odgovara svom svojom imovinom i sredstvima.

II CILJEVI I DJELATNOST SAVEZA

Član 10.

Ciljevi i djelatnosti Saveza su:

- Utvrđivanje i ostvarivanje programa rada;
- Unapređenje i razvoj karate sporta;
- Utvrđivanje i realizacija sistema takmičenja u Kantonu Sarajevo i BiH;
- Realizacija sistema takmičenja na međunarodnom nivou;
- Utvrđivanje i realizacija sistema polaganja za karate zvanja;
- Vođenje jedinstvenog registra klubova udruženih u Savez;
- Vođenje jedinstvenog registra takmičara, sudija, trenera, ljekara i delegata takmičenja;

- Uspostavljanje odgovarajućeg sistema zdravstvenog nadzora i saradnja sa Komisijom za anti - doping kontrolu;
- Školovanje i usavršavanje takmičara, trenera i sudija;
- Seminari i okrugli stolovi, debate i drugi oblici edukacija;
- Saradnja sa Olimpijskim komitetom BiH;
- Saradnja sa Sportskim savezom Kantona Sarajevo;
- Saradnja sa Karate savezom BiH;
- Saradnja sa Balkanskom Karate federacije (BKF)
- Saradnja sa Evropskom Karate federacijom (EKF) i Svjetskom Karate federacijom (WKF)
- Saradnja sa istim ili sličnim udruženjima, asocijacijama i drugim organima i organizacijama u zemlji i inostranstvu;
- Izdavanje biltena brošura u cilju edukacije i informisanja članstva;

Član 11.

Utvrđene ciljeve Savez ostvaruje u skladu sa Zakonom, Satutom i drugim općim aktima Saveza.

III ZASTUPANJE I PREDSTAVLJANJE SAVEZA

Član 12.

Lice za zastupanje i predstavljanje Saveza je Predsjednik Upravnog odbora. U slučaju odsutnosti Predsjednika, Savez predstavljaju podpredsjednici Upravnog odbora.

Lice za zastupanje i predstavljanje Saveza zastupa i predstavlja Savez u zemlji i inostranstvu, prema fizičkim i pravnim licima, bez ograničenja.

IV ČLANOVI SAVEZA

Član 13.

Svojestvo člana Saveza "Karate savez Kantona Sarajevo" može steći svaki karate klub koji ima svojestvo pravnog lica registrovanog na teritoriji Kantona Sarajevo i koji je registrovani član Karate saveza Bosne i Hercegovine.

Uslovi udruživanja su regulisani Registracionim pravilnikom.

Prava i obaveze udruženih članova regulišu se općim aktima Saveza.

V REPREZENTATIVNE SELEKCIJE

Član 14.

Savez formira reprezentacije u skladu sa pravilima i zahtjevima EKF i WKF i Karate saveza Bosne i Hercegovine.

Pod nastupom za kantonalnu karate reprezentaciju podrazumijevaju se nastupi u sastavu reprezentacije na međunarodnim takmičenjima.
Bliže odredbe ovog segmenta rada regulisane su Pravilnikom o radu reprezentacije.

VI ORGANI SAVEZA

Član 15.

Organi Saveza su:

1. Skupština,
2. Upravni odbor,
3. Predsjednik Upravnog odbora,
4. Nadzorni odbor.

1. Skupština Saveza

Član 16.

Skupština je najviši organ Saveza, sačinjava je po jedan predstavnik svakog udruženog kluba. Svaki predstavnik mora imati punomoć koju je potpisalo ovlašteno lice organizacije koju predstavlja, izuzev ako je predstavnik Predsjednik organizacije koju predstavlja.

Skupština se sastaje najmanje jednom godišnje. Skupštinu saziva Predsjednik Upravnog odbora po odluci Upravnog odbora Saveza.

Za punovažno odlučivanje na sjednici Skupštine potrebno je prisustvo više od polovine članova Saveza.

Način sazivanja i odlučivanja utvrđuje se Poslovníkom o radu Skupštine Saveza.

Član 17.

Skupština odlučuje o pripajanju, razdvajanju, transformisanju, raspuštanju i prestanku rada, kao i drugim statusnim promjenama Saveza.

Član 18.

Odlučuje o svim drugim pitanjima koja nisu u nadležnosti drugih tijela Saveza.

Član 19.

Skupština Saveza u okviru svojih prava i nadležnosti donosi i usvaja:

- Poslovník o radu Skupštine;
- Statut Saveza;
- Programe razvoja i unapređenja Karate;
- Politiku međunarodne saradnje;
- Sistem takmičenja;
- Sistem zvanja u Karateu;
- Izvještaj o radu Upravnog odbora;
- Izvještaj Nadzornog odbora;
- Odluke o priznanjima i nagradama;
- Rješava molbe i žalbe;

- Donosi odluke i o drugim pitanjima koja se odnose na rad Saveza, a izlaze iz domena Upravnog odbora.

Član 20.

Skupština Saveza bira:

- Predsjednika Upravnog odbora, (koji kao Predsjednik Upravnog odbora predsjedava Skupštinom);
- Upravni odbor Saveza i
- Nadzorni odbor.

Član 21.

U izuzetnom slučaju zbog nemogućnosti održavanja sjednice Skupštine Saveza, sve ingerencije skupštine preuzima Upravni odbor, uz obavezu da sazove sjednicu Skupštine najkasnije 60 dana od momenta otklanjanja uzroka zbog kojih se sjednica nije mogla održati, te Skupštini predoči sve donesene odluke na potvrdu.

Član 22.

Vanrednu Skupštinu saziva Upravni odbor na zahtjev najmanje 1/3 članova Skupštine, ili Predsjednik Upravnog odbora, ukoliko nije moguće održati sjednicu Upravnog odbora Saveza.

U slučaju da se takav zahtjev pojavi Skupština mora biti održana u roku od 30 dana od dana prijema zahtjeva, koji mora biti pismeno obrazložen.

Vanredna Skupština može odlučivati samo o pitanjima zbog kojih je sazvana, a odluke imaju istu važnost kao i odluke redovne Skupštine.

2. Upravni odbor

Član 23.

Upravni odbor se sastoji od:

- Predsjednika Upravnog odbora;
- 2 (dva) potpredsjednika i
- maksimalno 8 (osam) članova Upravnog odbora.

Odluku o broju članova Upravnog odbora donosi Skupština Saveza, vodeći računa da ukupan broj članova Upravnog odbora zajedno sa Predsjednikom mora biti neparan i ne može biti veći od 11 (jedanaest).

Mandat članova Upravnog odbora je 4 (četiri) godine, sa pravom ponovnog izbora. Ukoliko radi ostavke ili nekog drugog razloga mjesto u Upravnom odboru bude upražnjeno izuzimajući predsjednika, Upravni odbor će kooptirati zamjenu koja će biti potvrđena ili odbačena na prvoj narednoj sjednici Skupštine.

Član 24.

Upravni odbor je izvršni organ Skupštine Saveza i njoj odgovara za svoj rada.

Član 25.

Članovi Upravnog odbora se biraju iz reda istaknutih sportista i sportskih radnika. Prilikom izbora članova Upravnog odbora mora se voditi računa o tome da se ispoštuje što ravnomjernija zastupljenost Saveza.

Član 26.

Pored ostalih prava i dužnosti Upravni odbor radi slijedeće poslove:

- Priprema i utvrđuje prijedloge akata i odluke koje usvaja Skupština;
- Realizuje zaključke Skupštine;
- Bira i postavlja sekretara;
- Realizuje zacrtanu politiku međunarodne saradnje;
- Donosi opšta akta kojima se detaljnije reguliše rad pojedinih komisija, odnosno segmenata rada Saveza.

Imenuje selektore i direktora reprezentacija.

Član 27.

Za pomoć u radu Upravni odbor imenuje stručni savjet ili slijedeće komisije kao što su:

- Tehnička komisija,
- Takmičarska komisija,
- Komisija za zvanja,
- Sudijska komisija,
- Disciplinska komisija,
- Zdravstveno-ljekarska,
- Trenerska komisija.

U zavisnosti od potrebe Upravni odbor može imenovati i druge komisije ili pojedince za obavljanje poslova i pomoć u radu Upravnog odbora.

Član 28.

Za punovažno odlučivanje na sjednici Upravnog odbora potrebno je prisustvo više od polovine članova Upravnog odbora.

Način sazivanja i odlučivanja na sjednicama Upravnog odbora regulisan je Poslovníkom o radu Upravnog odbora.

Ukoliko se ni poslije tri pućena poziva nije mogla održati sjednica Upravnog odbora, predsjednik Upravnog odbora, ili ako je on odsutan, stariji potpredsjednik je obavezan zakazati vanrednu izbornu Skupštinu, u roku od slijedećih 30 dana, radi izbora novih članova Upravnog odbora.

Uz poziv za vanrednu skupštinu, klubovima se mora dostaviti upit za prijedloge novih članova Upravnog odbora.

Prijedlozi za nove članove Upravnog odbora, moraju se dostaviti najkasnije petnaest dana prije održavanja vanredne izborne skupštine, a svi prijedlozi koji dođu poslije tog roka neće se uzeti u razmatranje.

3. Predsjednik upravnog odbora

Član 29.

Mandat Predsjednika Upravnog odbora Saveza je 4 (četiri) godine sa pravom ponovnog izbora.

Predsjednik je zvanični predstavnik Saveza.

Predsjednik je odgovoran za poštivanje i primjenu Statuta.

Predsjednik upravlja svim aktivnostima Saveza i odgovoran je za provođenje usvojenih programa.

U hitnim slučajevima Predsjednik ima pravo da donosi odluke u ime Upravnog odbora. Odluke su privremenog karaktera i trebaju biti potvrđene na prvoj narednoj sjednici Upravnog odbora.

U slučaju privremene spriječenosti Predsjednik može svoja prava prenjeti na jednog od potpredsjednika.

Član 30.

Dva potpredsjednika bira Upravni odbor iz reda svojih članova.

Potpredsjednici su ovlašteni da Predsjedniku pomažu u radu, a na osnovu odluke Predsjednika i da ga u određenim situacijama zamjenjuju.

4. Nadzorni odbor

Član 31.

Nadzorni odbor bira Skupština.

Članovi Nadzornog odbora ne mogu biti predstavnici u Skupštini niti članovi Upravnog odbora Saveza.

Nadzorni odbor čine Predsjednik i dva člana.

Mandat članova Nadzornog odbora je 4 (četiri) godine.

Član 32.

Nadzorni odbor ima zadatak da kontroliše:

- Primjenu Statuta i drugih akata Saveza.
- Finansijsko poslovanje Saveza.
- Druge poslove koje im se stave u nadležnost ili proistiću iz propisa ili zakona.

U izvršenju postavljenih zadataka, Nadzorni odbor ima pravo da vrši uvid u svu dokumentaciju Saveza.

Nadzorni odbor svoje stavove, mišljenja i prijedloge utvrđuje većinom glasova članova.

Nadzorni odbor podnosi izvještaj o svom radu Skupštini Saveza, najmanje jednom godišnje.

Sekretar

Član 33.

Sekretara Saveza bira i postavlja Upravni odbor u skladu sa zakonskim propisima iz oblasti sporta i ovim Statutom.

Sekretar je lice angažovano za rad u Savezu po ugovoru o djelu sa mandatom od 4 godine. Isto lice može biti birano više puta.

Za sekretara može biti izabrano lice, VSS, VS, ili SSS sprema, koje je afirmisani sportski radnik u karate sportu, poznavalac organizacije Saveza u svim segmentima rada, majstor karate sporta uz znanje jednog od zvaničnih jezika EKF odnosno WKF. Upravni odbor može propisati i druge uslove potrebne za obavljanje ovog posla.

Sekretar je zadužen za rad kancelarije Saveza, za komunikaciju sa članovima Saveza i asocijacijama u koje je Savez učlanjen, kao i za komunikaciju sa trećim licima.

Sekretar je zadužen za koordinaciju rada radnih tijela Upravnog odbora.

Za svoj rad sekretar odgovara Upravnom odboru.

VII FINANSIJE

Član 34.

Za ostvarivanje svog programa rada Savez se finansira iz slijedećih izvora finansiranja:

1. Sredstva iz budžeta države, Kantona Sarajevo, Grada Sarajevo i drugih državnih, kantonalnih institucija namjenjenih za finansiranje fizičke kulture i sporta.
2. Doprinos udruženih članova, članarine, kotizacije na takmičenjima i seminarima i dr.
3. Vlastitih prihoda (marketing, sponzorstvo, donatorstvo i dr.);
4. Prihodi od dopunskih djelatnosti;
5. Ostali prihodi.

Član 35.

Savez u cilju sticanja materijalno-finansijskih sredstava osim svoje osnovne djelatnosti, može obavljati i druge dopunske djelatnosti.

U skladu sa Zakonom Savez može osnivati i preduzeće za obavljanje privredne i druge djelatnosti.

Član 36.

Naredbodavac za izvršenje materijalno-finansijskih obaveza je Predsjednik Upravnog odbora Saveza.

VIII POSTUPAK ZA DONOŠENJE STATUTA, IZMJENA I DOPUNA STATUTA I DRUGIH OPĆIH AKATA SAVEZA

Član 37.

Kada se utvrdi a postoje opravdani razlozi, Skupštinu Saveza može se podnijeti zahtjev za donošenje novog Statuta ili izmjene i dopune postojećeg Statuta.

Inicijativu mogu podnijeti:

- 1/3 članova Saveza,
- Upravni odbor Saveza,
- Nadzorni odbor.

Inicijativa se dostavlja Predsjedniku Upravnog odbora koji istu prezentira na prvoj sjednici skupštine i ako je opravdana, dostavlja Upravnom odboru radi izrade prijedloga Statuta ili prijedloga izmjena i dopuna Statuta.

Član 38.

Utvrđeni prijedloge Upravni odbor dostavlja Skupštini na usvajanje.

Prijedlozi su usvojeni ako je za njih glasalo natpolovična većina članova na Skupštini Saveza.

IX UVJETI I POSTUPAK ZA PRIPAJANJE, RAZDVAJANJE ILI TRANSFORMACIJU SAVEZA

Član 39.

Savez se može udruživati u Savez udruženja koja se bave istom ili sličnom problematikom.

Udruženje se može pripojiti drugom udruženju, ili drugoj nevladinoj organizaciji, može se razdvojiti na dva ili više udruženja, i može se transformirati u drugi oblik, o čemu Skupština donosi odluku u kojoj će regulirati što se imovinom za slučaj nastanka navedenih promjena.

Član 40.

Odluku o pripajanju, razdvajanju ili transformaciji, donosi Skupština natpolovičnom većinom

X PRESTANAK RADA SAVEZA

Član 41.

Savez dobrovoljno prestaje sa radom kada Skupština nadpolovičnom većinom svih članova Saveza donese odluku o raspuštanju Saveza.

Član 42.

Savez može prestati sa radom dobrovoljno ili po sili Zakona.

Član 43.

U slučaju prestanka rada Saveza sva njegova imovina biće podijeljena među članovima.

Podjelu imovine, likvidaciju Udruženja "Karate savez Kantona Sarajevo" izvršit će likvidacioni upravnik, kojeg imenuje Upravni odbor.

XI ZAVRŠNE ODREDBE

Član 44.

Ukoliko klub, članovi klubovi ili pojedinci udruženi u Karate savez Kantona Sarajevo prekrše odredbe Statuta, Upravni odbor Saveza može da ograniči ili suspenduje aktivnosti tog kluba, ili pojedinca.

Član 45.

Klubovima, njihovim članovima i pojedincima udruženim u Savez zabranjeno je da imaju sportske odnose sa organizacijama koje ne priznaje Karate savez Kantona Sarajevo i Karate savez Bosne i Hercegovine.

Član 46.

Karate savez Kantona Sarajevo izričito zabranjuje klubovima i njihovim članovima dvostruko pridruživanje sa bilo kojom drugom organizacijom koju ne priznaje Karate savez Kantona Sarajevo i Karate savez Bosne i Hercegovine.

Član 47.

Sva ostala opšta akta Saveza uskladiće se sa odredbama ovog Statuta u roku od 60 dana od dana stupanja na snagu.

Član 48.

Danom stupanja na snagu ovog Statuta prestaje da važi Statut Karate saveza Kantona Sarajevo usvojen na Skupštini Saveza, održanoj od 11.06.2008. godine

Sarajevo, 30.1.2010. godine

P R E D S J E D N I K

Mr.sci.med.dr. Merita Tirić - Čampara